


14422

f.

Des Cometen vn̄ ander erschein-

ung in den lufften / Im XXXI. Jar gesehem bedütung
Durch Andreen Perlach von Wirtschein / der sibenn
freyen / vnd natürlichen kunst maister / Diser zeýt
auff der löblichē hohen schül zu Wien / in der
Astronomey / was die himlischē leuff würck
ung / vnd ire einfluss betreffen ist /
verordenter Läser.

Darbey auch ein anzaigung / das Charion seine Judicia
nicht auß der natürlichē kunst Astrologia gemacht hat.



Astron.

570, 21

Dem Edlen vñ vhesten Herrn Beyten Solt-
ner/ Römischer/ Hungarischer vnd Behemischer/ König-
licher Mayestat zc. Rath vnd Chamerraister der ny-
der österreichischē lande/ seinem günstigen lieben Her-
ren vñ wolthätter/ Entpeüdt Andreas Perlachius
Steyrer/ der syben freyen kunst vñ Philosophiei
maister/ sein vngesparrt willig dienst züuor.

EWler vester Herr/ Nach dem im Mo-
nat Augusti des 1531. Jar ein Comet erschinen/ habē
vil vnd namhafft leüdt / den selbigē nit on klain verwundrūg
gesehen/ vnd ein yetlicher (wie dan die natur aller menschē ist/
als Aristotiles im anfang seiner Metaphisica schreibt/ das sy
alle ding gern wissenn wolten/ Sonderlich die künfftigen) ge-
fragt/ was diser Stern bedeüten sey/ so ist warlich nichts schwe-
rers hie auff diser welt/ dan künfftige ding (an sondre eingebügg
Gottes / wie den Propheten beschehen) anzuzaigen / vnd wie
wol Astrologia ein natürliche kunst / künfftig sachen auß lauff
des gestirns anzaigen thüt / Aber wie Ptholomeus leret nür in
der gemain/ als weñ einer von cinem ding sagt/ dz er von fern
gesehen hat/ das man so gar eygentlich nit beschreyben kan/ ye
doch das gemain anzaigen / einem verstendigen vñnd weysen
man genüg ist zü wissen/ dan auß dem selbigen gemain an-
zaigen mag einer durch sein vernunfft weytter bedencfenn / als
dann offe geschicht/ das ein verstendiger auß einem wort/ oder
eynem anzaigen / einer ganzen handlung grundt vñ fürnemē
bedencfen kan/ Welche sache aber dem gemainen man iner für
einn spot/ dan für ein kunst geachtet wüdt/ Dan dise kunst/ nit
für den gemainen man/ da kein verstanndt ist/ sonder für die/
welch die selbig durch yr vernunfft weytter vnd höher prauchē
kinnen/ erfunden ist worden/ Darumb fast übel angesehen zü
vnsern zeyten/ dz man also leichtfertiglich von allen künfftigē
sachen

sachen zu schreiben / vñ dem vnuerstendigen also auß praiten /
(dardurch die recht natürlich kunst Astrologia / nicht in flaine
verachtüg komen) sich vil vntersteen / Demnach ist bißher für
vnd für an mich gehalten / vnd nicht wöllen / (dieweyl yr so vil
von diesem Cometen geschriben habenn antag zü geben / Aber
etlich auß E. V. güte Herrn vnd freündt / die mir vil ehzen vñ
tes willē von E. V. wegen in E. V. abwesen bewisen / vnd
ch täglich beweyfen / mich so offt vñ vil gemant / vñ an mich
langt (nit angesehē die manigfaltig beschreibüg) ich solt von
E. V. vñ ern wegen / mein mainüg dieses Cometen halbē auch
zaigen / welchs wol mir beschwerlich / aber ab zuschlagē gar
ies vndancfbarnn gemüt gewesenn wer / Demnach hab ich
Ewer vnd yrer vast güten Herrn vñ freünden / auch meinem
sundern güten freündten vñ günnern / etwas nach meinem
verstandt auß natürlichen vrsachen / als vil mir Got
verlihen zü ehzen vnd gefallē / beschreiben wöl
len / fleysßiglich pittendises also in
allem pesten anzunemen.

Datū Wien am 13.
tag Nouem.

Zum Leser.



Freündtlicher lieber Leser / du solst
dise mein Prognostication / die ich auß der natür-
lichen kunst / Astrologia genant / genommen hab/
nicht dafür halten / dz es muß also geschehen / Dañ
als Ptho. der Haydnisch maister / vñ ein vnglaubiger schreibt/
Der weysß herschet über dz gestirn / vil mer ein götlicher Chris-
tenlicher mensch / mit seinem gepet gegen Got über dz gestirn
vnd seinem einfluß herschen mag / So hab ich alzeyt in meinē
Juditijs / disen prauch gehabt / das ich an natürllich vrsach/
nichts hab wöllen schreiben vnd an tag geben / da mit ein yet-
licher ab nem / das ich mich allain des grundts der natürllichen
kunst Astrologia genant behülff / vnd kainer andern / darumb
kainer mein Juditia / vergleichen sol / gegen des Charion / wel-
cher nit auß dem grundt / der natürllichen kunst Astrologia / son-
der auß ainer andern / die er vülleicht nit melden darff / genomē
hat / dañ es seind mer khünst darauß man khünstlig sachen an-
zaigē kan / aber nit allain bey den Christē / sonder noch bey den
Hayden (wie dañ dy recht gelerten vñ verstendigen Juristen
wol wissen) bey dem schwert vnd prant / warlich nit an sondre
grosse vrsach / schwärlich verpoten seind worden / dañ het Cha-
rion ainen rechten grundt der natürllichen khunst Astrologey /
wer nit möglich gewäsen / das er so vil schändlicher irthumb /
in seinem püchel / wider den grundt der kunst in druck het auß
geen lassen / vnd sollich schändlich irthumb / das auch ainem
anfahendē schüler züuerweysen wär / wil schweigen ain solchē
welcher der aller gelertist Astrologus geacht wil sein / vnd von
vilen (wie wol vñ kainem recht gelerten verstendigē man) dar-
für gehalten wirdt.

Der Erst schändlich irthumb / dē er in seinem püchlein hat
auß geen lassen ist / das er nit verstet / was das wörtlein Reuo-
lutio bey den Astrologos bedeiit.

Der Ander irthumb / das er nit hat kündt / zwainzig Reuolutiones nach einander gerecht machen / seind Sechs darunter durchauß falsch / nit allain mit den stunden vnd minuten / sonder auch mit iren Ascendenten oder auff steigenden zaichen.

Der Drit irthumb / das er nit souil gelernet hat in Astronomia / die dan ein grundt ist der rechten natürlichen Astrologey / das er west / wie weyt ein Planet von der Sonnen geen oder stehen müg.

Zum Vierten / das er die finsternus / die er in seinem büchel hat gesetzt / nit hat künne selber rechnen / welchs doch jr vil / die auch geleert sein wellen / gänzlich vermain / sonder hat die selbigen genomen auß des Hochgeleertē man Johannis Stöffler newen Kalendet / den er biß auff 1580 Jar volzogen vnd gemacht hat / was er jm aber vmb sein müh vñ arbeit für ein lob vnd danck gibt / findt man in seinem newgedruckten büchlein / da er von dem 44 jar schreibt / vnd das aller spötlichest / das er kein vorstandt hat der finsternus theorick / dann wie der Schöffler dy finsternus der Sonnen gerechet ha / auff das mittel des sibendē Clima / also lests der vnuerstendig man nür pleiben / vnd maint sy sollen auch gerecht sein / auff den anfang des Newntē Clima / darinn Perlin ligt / vnd hat nit so vil sein tag gelernet in Astronomia / das der Sonnen finsternus / mit den puncten vnd minuten irer beschatigung / sich in allen Climaibus verendern.

Der fünfft irthumb / das er vnd sein anhängen / wider alle natürliche kunst vñ vernunft / wollen das die würckung mög vor irer vrsach gen vñ vestiglich darauß haßte die finsternus des 29. jars am 17. tag Octobris beschehen / hab des Türcken überfal bedeiüdt / der doch am 14. tag Octobris weck ist zogen.

Der Sechst vnd der aller gröbest vñ schäntlichist irthumb das er den lauff der Planeten nit rechnen kan / Er hat sein Jurditiū (da mit er ander leüt vnpilllicher weys schmächē möcht) von newen iz druck geben / vnd dz selbig erlengert biß auff 50.

Jar/ vnd hat darzu gesetzt/ in welchem zaichen vnnnd grad die Planetē sein in einem yetlichen Jar/ vnd auff den tag wann die Sonn in Wyder geht/ hat die selbigen recht gesetzt auff das 30 vñ 31. jar die weyl er des stöfflers Almanach beuor hat gehabt Aber hienach biß auff 50. Jar / hat er nit so vil künde / das er auff einen tag im gantzē jar aller Planetē lauff het recht gerechnet/ Sonder in etlichen schier durch auß biß in die zwölff grad schentlichen geyrit/ vnnnd in etlichen jaten noch mer/ das warlich ein yetlicher in diser kunst vor allen dingen wissen vnd haben muß/ will einer anders etwas gerechts/ auß grundt der natürlichen kunst anzaigen/ was müssen für yrrthumb vñ falschē sein/ in andern seinen rechnungen/ vnd sonderlich so er ein Almanach gerechnet hat / die weyl er auff einē tag im gantzē jar/ nit hat künne ein rechte rechnunge machen der Planeten lauff Wüssen von nöten all Coniuncion vnd opposition auch ander aspect vnd habitudinis/ die not sein zu wissen (welcher anders wil auß der natürlichen kunst Astrologia recht Judiciieren) auch all falsch sein.

Die weyl aber sein Juditia/bey solcher vnwissenhait nichts dester weniger zütreten/ vñ sich also begeben / vnd er den rechtē grundt der Astrologey nit kan/ welcher wil also vnuerstendig sein/vñ sprechē/er hats auß der natürlichen kunst Astrologia/ muß auch von nöten folgen/dz er seine Juditia/ auß einer andern kunst nympt/ vnd vermaint es sein auff allen vniuersitetē lauter narren / man wüt sein vnwissenhait vñ vnuerstandt in der kunst Astrologia nit spürn/ oder auß nemen/ Mich dunckt auch gantzlich er hab sein Juditia genomen/ auß den büchern magistri Pelagi heremite in regno maioricarū vñ der beschwe- rung der geyst/ dan ein solchs zu Perlin abgeschribē ist wordē/ vnnnd mit aller zu gehörung gen Osterreich pracht/ das ich mit meinen augen gesehen hab / Es sein vorzeyten auch solch lewt gewesen/ wie Ptholomeus anzaigt / die mit solchē künsten vñ sein gangen/ vnd gesagt / sy nemen yr Juditia. auß der Astrologey/ so sy doch keinen rechten grundt (wie diser Charion) darz

inn
vnd
ger
es b
nym
lich
muß
das
ben
Die
dige
het
mā
den
res
an
nich
dise
also
nat
nas
weg
lich
lich
mic
den
wo
wu
alle
der
Do

inn hetten.

Zum Sechsten/das er mich vnuerschampt/mit vnwarheit vnd lügen antast/vnd schreybt zum Ersten ich hab in nit mit geringen scheltwortten antast / Zum andern ich het geschribē / es bring kein Finsternus schaden oder nachtayl / das sich keins nymmer mer finden wirt in meinem schreybē / Darauß ich entlich nym / das diser Charis entweder kein Latein verstect / oder muß mit einem bößhafftigen vñ tewflischen geyst besessen sein / das er darff also öffentlich vnd vnuerschampt einen an liegen.

Vnd wiewol mich sein vngegründt vñ vngeschickt schreyben/nit also hoch het angefochten / das ich ym geantwort het / Die weyl mir wol wissen ist / das kein recht gelarter vñ verstediger man / in mit seinem warsagē kan noch mag lobē / vñ wol het noch ein weyl leyden vñ schweygen mügen / Damit etlicher männer (die sich hochgelert achten / vnd disen Charionem / für den gelertistē Astrologū auß schreyen / Darunter auch Lectores Ordinary in Astronomia sein) vnuerstandt wol an tag vñ an das liecht kommen wer / Dañ sy all ander schenden vñ vernichten / so bewegt mich doch mein gewissen / die weyl mir Got disen verstandt hat geben / das ich wayß vñnd verste / wo man also still schwig vnd zu geb / das Charionis Juditium auß der natürlichen kunst Astrologia genomen wer wordē / möcht sata nas durch seine kinder einen solchen yrrthumb im glauben / bewegen / Der gleichē seyt Christi gepurt nit geschehē wer / Nemblich das die Bibel nür ein menschen dicht sein müßet / auff sollich sach mercken gar wenig Theologi zu vnsern zeytten / Aber mich vñ ander lewt vnpilllicher weyß an offnen Tafeln / schenden / schmähē / vnd auß richten / das können sy maisterlichen wol / das habenn sy auß yr Theologey gelernet / Darumb kein wunder ist / das zu vnsern zeytten so vil yrrthumb vñnd Secten allenthalben ersteen.

Dise vnd noch ander yrrthumb mer / wil ich in einem besondern püchlein gründtlichen anzaigen / vñnd darneben etlichen Doctorn vnd maistern respondiren / die sich nit schemen / einn

solchen vngelernten man wyder alle vernunfft vnd gründt / der
Syben freyen kunst vñ Philosophhey / zu schand vnd schmach
allen Vniuersitetn loben vnd preysen / vnd haben nit souil ge-
lernet in syben freyen künsten / vñ in der Philosophhey (darvon
sy iren Titel haben) dassy heten mügen erkennen / ob einer auß
grundt der natürliche kunst schrib oder nit / Darumb auch sol-
lich Doctores vñ Magistri vrsach sein / das zu vnsern zeyten
vil Vniuersitet abnemen vnd zu poden geen.

[Faint, illegible text, likely bleed-through from the reverse side of the page.]

2

Glorred.

Nach erscheinung dieses Cometen/haben mich vil nam-
hafft lewt Edel vñ vnedel gefragt/was dz für ein stern
wer / das er nicht so liecht vñnd klar wer wie ein ander
stern / warumb er in diesem jar so gleich erschinē sey / vñd nicht
daruor oder darnach / warumb solch stern gemaingklich etwas
übel bedewtten / wañ man in zum ersten gesehen hat / vñd in
welchem zaichen er am ersten erschinen sey / was er bedewt / vñ
am maisten droen sey / wie lanng sein würckung wern werde /
welchen Reichen vñd Landen er am maistē droen sey / Sol-
lich vñd noch ander frag mer / das zu lang wär alles zu erzelen /
Hab ich etlichē auß meinen güstigen liebē Herrn / mit kurtzē
wortten verantwort / Aber doch nit daran benüigt sein wöllen /
sonder die selbigen von anfang bis an das end begerdt an tag
zugeben / dz ich von yr gütheit wegē / die sy mir allzeyt bewisen /
kaines wegs hab können abschlahen / Vñd also in diesem püch-
lein mein mainung vñd güt beduncken anzaigen wöllen
von diesem Cometen / als vil mir dan Gott in denen
sachen verstant hat geben / wil auch kaines
andern schreybē dieses Cometen hal-
ben / durch dise mein main-
ung veracht haben
odder ver-
schlahē.

Der Cometen vnd anderer fiew- riger erscheinung im Luft vrsach.

Der Natürlich maister Aristotiles / ym Büch von den
erscheinungen in der höch / spricht / das dise vntre welt /
müß den obern vmbschweyssen oder vmbblausen an-
rührig sein / Von welchen alle yre kröfft geregirt werdenn / Der
gleichen spricht auch Ptholo. in seinen treffentlichen Hundert
sprüchen / das diser vntern welt angesicht / den hymlischen an-
gesichten vnter worffen sein / Als der yrrdisch vnder dem hym-
lischenn / Der gleichenn der yrrdisch Styer / dem hymlischenn
Styer zē. vnterworffen sein.

So spricht auch Plato dz die vnterthanen / oder vnterworf-
fen / den herrschenden / die vntern den obern nach dem gesatz der
natur sein weichen / vnnnd gehorsam laysten / Dienen auch der
selbigen gepietung / dan die gleichen mit den gleichen / vnd eyn-
helligen oder eyngestältigen leicht über ein kumenn / Auß disen
sprüchen der natürlichen maistern / vnnnd andern augenschein-
lichen sachen / die täglich fürkommen ist allen menschen (welch
anders ein vernunft habē) genügsam wissen vñ offenbar / das
alle natürliche sachen / inn diser vntern zerrüttlichen (auß den
Vier Elementen gemacht) welt / yr vrsach haben vnnnd regiert
werden / Durch die manigfaltigen vnd wunderbarlichen bewe-
gung der Planeten / vnter in selbs / vnd mit den festen stern / ge-
rings vmb die Vier Element / mit yrn zusamenfügung vnnnd
Aspecten / die sy vntereinander an vnterlaß haben / Vnnnd also
durch yr stäte verendrung / die Vier Element / vnnnd alles was
auß in vnd in ynen ist / Auch für vnnnd für verendert in solcher
gestalt dz etlich ding werden gepert / etlich nemen auff / etlich wy-
der ab / etlich werden zerüt / vñ darnach wider in ein anders ver-
endert / dz kain natürlichē dings in diser vntern welt wesen stet
oder fest / kan noch mag pleyben / als lanng dise vntre welt / auß

den Vier Element zu sam gesetzt / in diser ordnung pleybt / dan
yr vrsach / nemlich der hymlich lauff / vnd sein einfluss / sich all
augen plick verendern.

So sein etlicher Planeten zusamenfügung / vnd ander yhr
Aspect vntereinander vnd mit den festen stern / auß yr ange-
schaffner natur gencygt / einzufließen vñ bewegen felten / etlich
feuchtigkait / etlich dürrn / etlich hitz / etlich warm vñ feucht. 7c
Wen nun ein gestirn kumpt mit einem hitzigen einfluss / das ge-
schicht sonderlich / wen der Planet Mars (welcher an imselber
vñ angeschaffner natur / bey den Astrologos hitziger vñ fewri-
ger natur geacht wirdt / der selbigen qualitet auch anhengig ist
die dürrn) mit andern festen stern seiner natur ein herscher ist / so
bewegen sy warm vñ dürr tämpff im erdrich / vñ der sind zwais
erlay / Etlich habē ein Lüfftige feuchtigkait in yhne / etlich aber
nit / Sein solcher tämpff wenig / vñ müg / nit auß dem erdrich /
machen sy die wasser vnter dem erdrich warm / Sein yhr aber
vil vnd nit stat haben künne in den hōlen des erdrichs / mügē
auch nit herauß prechen mit gewalt übersich / vnd machē also
Erdpiden / Darumb vil vnd groß wind nach den Erpiden
gemainglich kummen / Mügen aber solch Tämpff auß dem
Erdrich / vnd habē kein lüfftige feuchtigkait / vñ sein yr wenig
machen kein wind / sein yr aber vil / werdenn vngestüm wind
darauß.

Haben aber die warmen Tämpff / ein lüfftige feuchtigkait /
(die noch vil subtiler ist dan des öls) vñ sein der selbigē wenig
vnd zerstrewt / enzündē sich ym lufft / vnd erscheinen darauß
fallendt stern / prinnend fertzen / stangen / prandt / vñ der gleichē
Ist des Tämpffs mehr vnd grösser / erscheinen im lufft feürige
Trachen / fewrig springend gayß / fewrig männer / vnd ander
seltzam fewrig ding / aber wern nit lang.

Wo aber solchs Tämpffs vil ist / vnd vhest beyeinander
von wegen seiner subtilithet vnd ringheyt / erhebt er sich über-
sich / vñ durch die krafft der stern durch den mitl tayl des luffts /

welcher kalt ist / vnd von wegen der wyderwertigen natur noch fester zusamen gedruckt / vnd wirdt also zogen / biß in den obersten tayl des luffts / höher kan die matery des Cometen nit kommen / dan auß natürlichen bewegung die subtilen vnd geringe übersich steygen / vñ die schwären vntersich / sich bewegen / So ist nichts subtiler vnd geringer / in diser vntern (auß den Vier Elementen) welt / vnnter der spher des Mons / dann das feur / Darumb das feur die oberst stat hat vnter allen dingen diser welt / berürt den hymel des Mons / Die weyl aber die matery des Cometen / etwas von der yrdischen matery hat / vnd nit so subtil vñ so ring ist als das feur / darumb der Comet in die stat oder spehr des feuers nit kunnan kan / dan er gröber vñ schwärer ist / muß er seiner schwärheit wegen vnter dem Element des feuers pleyben.

Was aber warmer natur ist / vnd ein lufftige feuchtigkait hat / das erzündt sich pald von der hitz / Die weyl aber der Comet im oberen tayl des luffts der hitzig ist vonn der nähent des feuers / sein stat hat / erzündt sich die matery des Cometen / vnd hebt also an zu prinnen / vnd von wegen der grossen menig vñ dick der matery / kan sy nit bald verprinnen / vnd verschwindē als die feuren Drachen / vnd ander der gleichen feurwerck / die im lufft erscheinen / So zeucht das gestirn täglich mer übersich / zu zeyten mer dan verprint / so erscheint der Comet alle tag größer / zu zeyten nit mehr dan verprint / so pleybt der Comet in einer größ / zu letzt aber weniger oder gar nichts hebt der Comet ab zunemen vnd flainer zuscheinen.

Wen ein solcher stern lennger dann syben tag scheint / haist man einen rechten Cometen / Dan als etlich Lerer schreyben / ein rechter Comet muß auff das wenigst sibben tag scheinen / vñ diser stern wirdt Cometa genandt auff die Ebreischen sprach / dan Comet auff yr sprach / ein schopff haist / Die weyl dise stern gemeinglich mit einem schopff / od schwantz erscheinen / habē sy Cometen genant / das ist schopffstern / vnd von wegen


yrer manigerley gestalt / inn welchen sy erscheinen sein / haben in
auch manigerley namen geben.

Vnd wie wol merer rayl der Cometē / sonderlich Welch auß
natürlicher vrsach kumen / sich bewegen mit dem lauff des ober
sten hymel / in 24. stunden gerings vmb das erdrich / vñ nichts
desterweniger das gestirn für vñ für übersich zeucht andre ma
tery / so kumpt der Comet in 24. stunden wyder über das orth /
da die matery übersich wirt zogen / vnd also durch die krafft der
gestirn alles zu samen auff einen hauffen gepracht vnd versam
let wirt / Darumb es auch gar selten geschicht / das mehr recht
Cometen dan einer gleich zu einer zeyt erscheinen / vnd wie wol
zu zeytenn geschicht das mer solch stern erscheinen auff ein mal
vnd zu einer zeyt / sein aber nit recht Cometen / dan sy nicht als
lang wern / als ein rechter Comet wern sol.

Das aber der recht Comet erscheint wie ein runder stern / ge
schicht nit / darum dz sein Cörper also gleich rund wäre / Son
der es geschicht das er also rund gesehen wirt / von wegen der
grossen höch vnd weyt / als wen wir ein fewz sehen von fern /
oder ein liecht das sunst in der nahent lenglecht / vnd nit rund
gesehen wirt / in der ferr erscheint dasselbig / als ein runde prin
nende Kugel / vñ alles liecht in die ferr oder weyt / erscheint als
es rund wäre / ist die vrsach das die krafft des gesichts / sein maß
hat in der weyt oder höch / damit es die recht groß vnd gestalt
auß nemen mag / wo ein ding über die recht weyt gesehen wirt /
so wirt es ye weyter ye klainer gesehen / vnd ye klainer ein Cör
per gesehen wirt / ye baß vergleicht es sich mit der runden ge
stalt / Dann die natur des augß ist / wens nicht mag begreyffen
die recht figur vnd groß (das geschicht wenn ein ding weyter
vnd höher ist / dann die recht maß des augß außnemen kan) so
formiert ein figur die im selber gleich ist / das ist die rund fi
gur / Also thut auch mit den mitteln farben / wo es von wegen
der weyt die selbigen nit recht kan außnemen / formirt das aug
sein aygne farb dz ist plöblet / Darum auch die perg von fern
gesehen als sy plab wern erscheinen / so sy doch nit plab sein.


Ausz was ursach der Comet im

31. Jar erschin/entsprungen sein.



ES schreybt Ptholomeus im andern buch seines Quadripartit/wen finsternus Sonnen vnd des Mons geschehen/vnd Mars regierer sey über solch finsternus/so erschein gemeinglich seltsam vnd wunderlich fewrwerck/sonderlich wen ir würckung am fröfftigsten seind inn luffte/So schreybt auch Desfahalla das er nye kein finsternus der Sonnen gesehen hab/es sey alweg etwas wüderlichs darnach gefolgt/So ist es nun aller welt offenbar/dz zwofinsternus/Sonnē vñ des Mons geschehen seinn im 30 Jar/in einem fewrigen zaichen/vnd beyd oberster regierer (wie dan Astrologi angezaigt habenn) Mars gewesen sey / Ist nicht

so groß zuuerwundern / das ein Comet vnd ander fewrig erscheinung gesehen sein worden in den lufften/Als dan geschē ist am ende des Wertzgen / in der woche Judica des 31. Jars/so payder finsternus würckung schier am fröfftigsten gewest/dan im Lungaw auß glaubwürdigē personen anzaigē/erschinen ist/ein solcher stern mit dreyen schwerttē/wie hic bey stehet/vnd etlich nacht vnd morgen nacheinander von vil personen gesehen worden.



Gleich zu der selbigē zeit im Ta-
matal / nahent bey Kamings-
stain / zwen ander Stern̄ ersch-
inen / in solcher gestalt / vñ auch
etlich nacht gesehen worden.

Zu solcher aber erscheinung
nit wenig zu der selben zeit ge-
holffen habē / mit sampt der fin-
sternus würcküg / etlich Aspect
der Planetē / Nemlich der viert
schein Martis vnd Jouis / da

Jupiter ist gestandē im gegenschein des Mons finsternus / vñ
Mars im vierden / Der gleichē auch ander Aspect / als der ges-
genschein Jouis vñ Mercurij schier dreymal in einem monat
vnd etlich wenig tagen / vnd ist Mercurius allweg nit ferr ge-
wesen vō der stat / da die finsternus der Sonnē vñ des Mons
geschehen sein / Darnach auch nahent dabey geschehen der ges-
genschein des Jupiter vnd der Sonnen / der gleichen der dritte
schein Jouis vnd Martis.

So hat sich nachmals im Julio / nahent bey dem newmon
zu tragen / der gegenschein Martis vñ Jouis / vñ Mars gleich
an der stat gewesen darinn die finsternus der Sonnē ist besche-
hen / vnd zu der stundt des Newmon der gegenschein / durch dy
winckel Martis vnd Jouis gewest / Mars der auff der Mit-
tag Lini gestandē / nit ferr vō der stat / darinn die finsternus der
Sonnen beschehen / vnd schier zu der stundt des Newmon ein
wenig daruor / ist der Mon mit dem klain hund Mercurij vñ
Martis natur auff gangen.

Nach disem Newmon vnd opposition Jouis vñ Martis /
haben die hutztag bald angehebt / vnd fast haisse vñ truckne
zeit gefolgt. Dise vrsach (wie wol der Sonnē finsternus würck-
ung im abnemen gewest) haben also ein materi im erdrich be-
wegt / vnd über sich zogen / darauß diser Comet mit dem langē

schwantz erschienen ist / vnd als etlich Astrologi schreiben / das an sundern einfluss des Mars / die Cometen kainē schwantz haben / welchs ein groß anzeigen gibt / das dise oppositiō Martis vnd Jouis / sonderlich disen Cometen bewegt vnd gepert hat.

Item am 14. tag Septembris / hat man zu Wien entpfunden ein Erdpiden / aber nit sehr groß. Zu letzt im October sind von vil personen gesehen worden drey Sonnen / vnd von den außern zwayen sind plütige straim gangen.

Wie wol nun kain Astrologus (welcher Juditia ich gelesen hab) dises Cometē / noch and feüriger erscheinügmeldung than hat / ist kain andre vrsach / dan dz dise finsternus vñ der selbigē herr oder regierer Mars / bey kalten vnd feuchten stern gefundē sein worden / darauff kainet hat mögen nemen oder ermessen / das ein langwirige hitz vnd truckenheyt fünfftig were / wie wir dan durch das 30. vnd 31. jar biß auff erscheinung des Cometē kain langwirige hitz oder truckenheit / nye erfunden haben / sonderlich in vnsern landen / welchs anzweyfel geschehen wer / wo die finsternus vnd jr herr nit bey kalten vñ feuchten stern gewesen wern / vnd wie wol die oft gemelt Opposition Martis vnd Jouis ein arckwon hat gemacht / Darumb das sy geschehen würde / nahent bey der stat der Sonnē finsternus / So hat mā herwyderumb ermessen das der selbigen würckung im abnemē were / Die weyl aber die vor gemelt finsternus der Sonnen vñ andre Aspect / welch an der stat der finsternus oder gar nahent dabey geschehen sein / der gleichen yr regierer / vrsach sein dises Cometē / wirt anzweyfel der selbigen würckung (welch sunst im Frebruario des 32. jars end gehabt) wyder zum tayl vernewē / was aber die selbigen bedewt haben / vnd warumb die finsternus schedlich vnd nachtailig sein / hab ich im vergangen jar in einem besondern püchlein beschryben / vnd im druck auß geen lassen.

Warumb Cometen gemainklich et- was übels bedeüden.

Es ist durch aller natürlicher maister anzaigüng / klar vñ
offenbar / das dz erdtrich vnd wasser ein müter vnd ein
materi seind aller geperenden vnd zerrutlichen dingen /
welche s̄ manigfaltig vñ wunderparlich einfluß des himels an
vnterlaß machē ist / vñ in dem obern tayl des erdtrichs / alle ge-
wächs die dē lebendigē thierē nütz sein / als pawm / kreüter / wur-
tzē herfür dringē / vñ ein yetlichs nach seiner angeschaffner na-
tur die feuchtigkait an sich zeucht / dy im von dem schöpffer vñ
anfang geben ist worden / Also das die kreüter / pawm / wurtzen
welch warmer natur seind / ziehen an sich auß dem erdtrich die
warmen feuchtigkait / welche aber kalter natur seind die kalten
feuchtigkait / Also ein yetlichs zeucht die feuchtigkait / darzü es
beschaffen ist wordē / das zū seiner natur gleich vñ bequem ist.

Also auch im leib des meschē / ein yetlichs glied an sich zeucht
die feuchtigkeit der speyß die im dienstlich ist zū seinem auff ne-
men vnd vnterhaltung / die grober vnd kalter natur glider / die
grogen vñ kalten feuchtigkait / die hitzigen glider / die hitzigen
feuchtigkait zc. Also seind etlich pawm / wurtzen / kreüter vñ yr
frucht giftig / dan die selbigen ziehen an sich / auß dem erdtrich
solche feuchtigkait / die widerwertig ist der Complexiō der men-
schen vnd andrer thier / vnd werden für gift geacht / welch aber
pawm / kreüter / wurtzen zc. guter natur seind / ziehen an sich die
guten feuchtigkait / vnd treiben von inen dy bösen.

Haben nun die kreüter / wurtzen vñ glider der menschen die
krafft das sie an sich ziehen / ein yetliches wie es sein natur erfor-
dert / wie vil mer die himlischen Körper / gegen welche dy größ
der kreüter vñ ander ding kein gleichniß ist / dieweil nach irem
einfluß / alle ding in diser vntern welt regiert werden.

So hat ein yetlicher Stern am hymel / ein besondre vnter-
schidliche natur von dem andern / wie auch die kreüter / wurtzē

E

ein yetliches ein sondre vnaussprechliche natur hat nach seiner gestalt/durch welche es ein vnterschyd hat von dem andern in seiner krafft/Also hat auch ein yetlicher Stern etwas besonders einzufließen/wurcken/vnd bewegen in diser welt/etlich gut einfluß/die dem menschen vnd andern nodtürfftigen thieren vnd guten gewächssen/dienstlich sein vnd bequem (etlich aber widerwertig einfluß/welch dem menschen vnd andern thieren nit dienstlich sein.

Wen ein gestirn kumpt mit einem guten einfluß/so bewegt es vnd zeucht auß dem erdrich vnd wasser die guten vnd gesunden Tämpff vnd feuchtigkait/die da bequem sein allen guten wachsende dingen in diser welt/menschen vñ andern guten thieren/vnd treiben die bösen vnd widerwertigen feuchtigkait weyt hin dan/die selbigen guten tämpff vñ feuchtigkait/durch die guten gestirn übersich zogen/machen ein guten temperierte luft/dardurch alle gute gewechs auff dem erdrich/sich merñ vñ auffnehmen/Es werden dardurch dy frucht vnd thier gesundt/vñ nemen alle ding zu/wächst alle ding mit grosser manig/vñ werdē alle ding wol sayl/ In Summa alles das auff diser welt/welchen der lufft dienstlich vñ bequem ist/nimbt alles auff/vñ haben alle gute ding glückselige zeyt.

Darumb sich oft begibt vnd erzaigt /wen der lufft also geschickt ist vñ erfüllt mit gutem einfluß /der gut tämpff vñ feuchtigkait bewegt vnd übersich zeucht/ sieht man in dem Mayen an dem laub vñ freütern zu morgens frü ee die Son auff geet/weysßz ding wie ein zucker/süß/oder zu zeytē wie ein honig/vñ ist ein gewiß anzaigē/eines guten vñ gesunde lufft / vñ gut vñ sanftmütig/od glücklich gestirn regierñ/welchen dingen aber der gut lufft zuwid ist/als den giftigen thierē/giftigē freütern/wurtzen vnd pawmen vnd andern bösen dingen / die selbigen sterben/verderben vñ haben alles vnglück/darumb zu den guten fruchtparn/gesunden vnd glückseligen zeyten/wenig giftiger thier gesehen werden/dan sy sterben vnd verderben im gü

ten lufft / ~~er~~ er ist wiß jr natur / etlich verkriechē sich in die tieff
der hōler des ~~er~~trichs / der gleichē die giftigen bösen wurtzen /
kreüter vnnnd ander böß vnnütz ding / wachsen wenig / nemen
ab / steen auß vñ verderben / Darumb sicht man in rechten ges
sunden jarn wenig Schwam vñ ander vnnütz ding wachsen.

Zu solchen zeyten haben die fromen leüdt vil glücks / nemen
auff am gesundt / am reichthum vñ in allē jr sache vñ fürnemē /
zu solchen zeyten regnieren from erber göttlich leüdt / die zu frid
vnd ainigkait allzeyt rathen vñ den gemainen nutz betrachtē /
aber die bösen haben alles vnglück / vñ gen ynen all jr anschleg
hindersich / dann die bösen Planeten / vnter welchen sy gepozn
schwach vnd vnglückselig sein.

Wan aber ein gestirn thumbt / das böß giftig dampff be
wegt vnd übersich zeucht / die dem menschen vñ andern guten
thieren von natur zuwider sein / die vergiften den lufft / das die
menschē / sonderlich die fromen vñ guten thier / nit können auff
nemen / der gleichen die guten frucht / vnd nemen nur ab / vnd
wachsen alle ding übel / darauß folgt teürrung / vnnnd haben die
fromen leüdt vñ die guten thier vil widerwertigkait vñ angst böß /
der gleichen gerath alles das übel was dem menschen vnd an
dern thieren dienstlich sein mag.

Aber die bösen giftigē thier (nach dem der giftig lufft inen
dienstlich vnd bequem ist) die mern sich / darumb zu den selbi
gen zeyten sicht man vil böß vñ vnnütz gewürm die den men
schen vnd guten thiern / auch den guten fruchten schedlich vñ
nachtailig sein / der gleichen mern sich fast die bösen giftigen
vnd vnnützen kreüter / wurtzen vnd pewn / Es wachsen auch
zu den selbigen zeyten vil Schwamen an den pawmen vñ auß
dem edtrich / vnd was vō natur gut ist / wirdt durch den bösen
lufft mangelhaftig vnd verdirbt / darumb zu den selbigen zey
ten / die guten frucht fast wurmässig werden / vnd die bösen vn
nützen frucht geraten wol. Zu solchē zeyten / nemen die bösen
leüdt überhandt / vñ vnter steen sich mit gewalt zuregieren vñ

heben vil krieg vñ alles übel an / vnd wo gleich gewis verhanden ist / richten die bösen vntrewen menschen ^{als die wücherer} vnd der gleichen vntrew leüdt das all-^{ung} tewrer werden / dan zu solchen zeyten / wen böß plantten regierñ / haben allain die bösen leüdt glück vnd nemen auff / dan jr gestirñ / darunter sy geporn seind regierñ / vnd pringen ynen kein schaden.

Wen nun ein solich gestirñ kumpt / das solich böß vñ giftig tämpff vñ feuchtigkait in hölen des erdtrichs verschlossen / da dann schwebel hüttrich vnd ander giftig materi wechset / bewegt vñ übersich zeucht / wo solch tämpff mit gewalt auß dringen / vnd erdpidē machen / vergiffte den lufft an dem selben ort da sy auß prechen / vnd machen vil vbels vñ widerwertigkait / mit heffigen frantheiten vnd ander nachtail / in fruchten vñ andern sachen.

Wen aber solich böß tämpff im erdtrich bewegt / also durch das gestirñ übersich zogen werden / vñ haben ein lufftige feuchtigkait bey inen vnd sind jr ein grosse menig sind auch fast bey einander / dringen also durch den mitteln tayl des luffts von wegen jr ringhait vñnd kresser der gestirñ / darnach durch den lauff des himels vnd nahent des feurs / ertzündt sich solch materi vñ erscheint also als ein stern.

Vnd wen oft vñ vil solich stern vñ seltsam feurig erscheinung im lufft gesehen werden / ist ein gewis zaichen das böse gestirñ regieren vnd bösen einfluß machen / dan sy bewegen vnd ziehen vil böse tämpff vbersich inn lufft / welch böß tämpff am übersich steigen / den lufft vergiffen vnd darnach ander ding / das im lufft lebt / wöchst vnd sein wesen hat / Darnach wann die materi oben in der höch verprunt / felt das groß irdisch ding wider herab / dz auch vngesund ist / vñ vermischet sich mit dem lufft vñnd mert die vorzig vergiffung / darumb zu den selbgen zeyten / wen solich materi (durch welche solch seltsam feuer im lufft erscheine) durch dz gestirñ würdt übersich zogen / sieht man oft den lufft als wen er staubig wär / das ist ein gewis zaichen

ain
we
zu
da
tis
der
hi
ess
ge
na
ric
un
vñ

ain
mi
em
im
sag
vñ
ich
mi

ha
für
ist
ge
vñ
15.

aines bösen vngesunden vnd vergifften luffts.

Auß diesem allen mag man wol abenemen / das dy vrsach /
welch die materi dises Cometē übersich zogen hat / den sterben
zu Wien vnd andern orten gemacht hat / dan gleich zu der zeit
das ist im Julio / so die offte benent opposition Jouis vñ Mar
tis geschehen ist / vñ dy böß materi darauß der Comet ist wor
den / übersich hat anheben zusteigen / nach welchem ein grosse
hitz vnd dürre zeit gefolgt / sind auch vil vnnützer vnd wurm
essiger frucht worden / vnd dz jung volck dasselbig an alle maß
gessen / vñ in inen ein böse faule feuchtigkait gepert / welche dar
nach auch von der subtiligkait vnd geschickligkait der Comple
xion / liderlich den vergifften lufft an sich genomen haben / Dar
umb auch am aller maisten dy jungen leude inficiert werden /
vnd sterben.

An welchem tag Augusti diser Comet am ersten gesehen sey worden.

Es ist ein warhaffter vnd ansehlicher man zu mir kummen
am Veindtē tag des monats Augusti des 1531. jar / vñ mich
mit sonderm ernst vñ fleys gefragt / ob ich nit ein stern mit ein
em Pfawenschwanz gesehen het / Hab ich im (wie es dann an
im selbs war) geantwort ich het kein gesehen / hüb er an mir zu
sagen / wie er drey morgen nacheinder / zwischen ein vnd zwo
vren gesehen het ain solchen stern / nach seinem anzaigen / hab
ich auß genomen / das er gestanden ist zwischen auffgang vnd
mitternacht.

So ich solches vernam / hab ich mein achtung darauff ge
habt / aber vor vngewitter / die selbigē nachfolgendē tag nichts
kinnen außrichten / bis auff den 13. tag desselbigē monats / da
ist er zu morgens gesehē wordē / zum abendt aber nit / von wes
gen der gewülck / am vierzehenden tag hat man in zumorgens
vnd zu abent gesehen / der gleichen am 15. tag / Aber nach dem
15. tag nymer zu morgens / sonder allweg nur zu abents / Dan

vor dem 15. tage / ist er weyt vor der Sonnē auffgangē / Aber darnach / mit vñ nach der Sonnē / vnd ist also allweg zu abent gesehen wordē / biß auff den dritten tag Septēbris / Aber schier ein achttag daruor / ee er verschwundē ist / hat er kein schwantz mer gehabt in der Steyrmarch / Kernten vñ Krain / als ich vō glaubwürdigen leüden bericht worden bin / ist er langsamer erschin / vnd vmb ein achttag lenger gesehen worden.

Auß dem mag ein yetlicher abnemen / das diser Comet am ersten erscheinen sey / am sechsten tag Augusti / da dy Sonn gewesen bey dem hitzigen stern in hertzen des Löwen / Martis / vnd Jouis natur / vnd da die Sonn bey diesem stern ist gewesen im sechsten Jar / ist der Comet des selbigen Jars auch erschin / als ichs von etlichen verstandē diser kunst vernumē hab / dan ich der selben zeyt ein schlechter schüler noch gewesen bin vnd nichts von diser sachen gewist.

Das er aber gegen mittag langsamer ist erschienen / ist dy vrsach / das er gegen den andern stern fast nider gestandē ist / das man in nit so weyt hat können sehen als man ein rechten stern sehen mag / dan das erdtrich vil grösser ist / dan ein Comet sein mag / Aber der klainist stern / den man sehenn mag / ist grösser dan das erdtrich / macht die groß mächtig hoch das sy so klain gesehen werden.

In welchem zaichen diser Comet am erstenn erscheinen sey.

Auß des glaubwürdigē mans frag / bin ich bewegt worden / weyter zgedenckē vnd ermessen dz diser gut man / kaines wegs het gefragt vmb ein solchen stern allain / er het in gesehen / vnd sunderlich dy weyl man hernach da das vngewitter vergangē gesehen hat.

Der gleichen hab ich bey mir betracht / seinen behenden aysgen lauff / das etlich tag schier biß inn dy zehen grad / wider das firmament nach ordnung der zaichen sich bewegt hat / hab ich

nit
ster
gle
wa
gef
vo

den
vn
ser
am
ge
erfa
sein
nür
vo
ein
Co

Dr
nen
sind
nat
des
wey
gust
die
das
am
sen/
nus
güt

mit künne bey mir ermessen das er still sey gestanden / vom sech-
sten tag seiner erste erscheinung / bis auff den 15. tag / da er schier
gleich in einer Lini mit den hindern zwayen redern des grossen
wagens gestanden ist / vnd dem gesicht nach / mitten im löwen
gestandē nach seiner leng vñ nach der prait bis in dy 20. grad
vom thier kraiß gehabt.

Hab im also fleissiglich nach gedacht vñnd gerechnet auff
den sechsten tag / vñ auff die zeyt / wie mir der man anzaigt hat
vnd gefunden / wo er im Löwen am ersten wer erschinē / mit di-
ser ob angezaigter prait / vnd zu der stund / wie oben angezaigt
am sechsten tag Augusti / het man den Cometen in landen / ge-
gen mitternacht auch ee gesehen / das ich doch von kainem nye
erfarn hab künnen noch mögen / welch von mitternacht künne
sein oder auß irñ schreyben / Sonder all anzaigt / man hab yhn
nür umb vnser frauen tag vnd darnach gesehen vnd nit dar-
vor / Das er aber zu morgēs am ersten erschinē muß sein / gibet
ein anzaigen dy finsternus der Sonnen / die ein vrsach ist dises
Cometen / dan sy auch im auffgang geschehen ist.

Dy weyl er aber zwischen aym vnd zwayen vhren ob dem
Drizonten hoch gesehen ist worden / muß er ee auff gangē sein /
nemlich auff das kürzest umb ain vhr / zu der selbigen stund /
sind auff gangen dy hewpter der zwilling Mercuri vñ Martis
natur / muß von nöten folgen / nach anzaigen vnd gelegenheit
des Mars der in am ersten gesehen hat / das diser Comet nit
weyt von den selbigen stern steen hat müssen am sechsten Au-
gusti / dan wo er weyt vom thier kraiß gestanden wer / heten in
die da wonē gegen mitternacht / aber ee sehen mögen / dan wir /
das ich bey kainem hab erfragen mügen.

Darumb diser Comet / auß ob angezaigten vrsachen / muß
am ersten erschin sein nach dem obersten himel / mitten in freb-
sen / Nach dem himel aber der westen stern / nit ferr vō der pild-
nus der zwilling / nahent bey den hawpten / vnd ist dz auch ein
güt anzaigen / das der vierdt schein der Sonnen finsternus in

Krebsen felt/darnach auch der vierdt schein der offtgemelten op-
position Jouis vnd Martis im Julio geschchen.

Auß diser speculation vñ satzung der himlischen spehz / gibt
es sich das er nür zu morgēs hat müssen am ersten erscheinen / vñ
nindert zu abends. Vnd also / wie Ptholomeus schreibt vom
Cometen / ist er Lilffzaichen nach irer ordnüg von der Sonnē
gestandē. Folgt auch darauß / das sich diser Comet hat müssen
am ersten bewegen / vom sechsten tag Augusti biß auff den 15
tag mit seinem aigen lauff nach der leng Zodiaci / od nach ord-
nung der zaichen / vom mittel des Krebsen biß auff die mitte des
Löwen vngesärllich / vnd nach der prait von dem Zodiaco od
thier kraiß gegen dem grossen wagen / wie dan der hochgelarte
man Pontanus vō ainem Cometen schreibt / der sich auch der
massen bewegt hat mit seinem aigen lauff gegen dem wagen /
vnd wider von im / Also gibt es sich das wir disen Cometen er-
haben mügen sehen / vñ darnach die gegen mitternacht / nach
dem etlich tag / ist er schier in ainer prait belibē vñ hat sich dar-
nach widerumb gegen dem thier kraiß bewegt in der prait / vñ
kummē über den ebennechtigen Cirkel / nach der leng aber des
thier kraiß / ist er kummē mit seinem aigen lauff / biß in den Scor-
pen / ja auch wol glaublich ist gar in Schürzen / dy weyl man
yn / in landen gegen mittag lenger gesehen hat.

Wie vil aber diser Comet / von tag zu tag / dy weyl man in
mit Instrumentē hat obseruierē mögen / bewegt hat / nach der
leng vnd prait des thier kraiß der gleichen dy groß / höch / vnd
ander sachen / dasselbig hat klärllich genüg / mein sonnder güter
freündt Johañ Schoner Astronomus zu Nürnberg anzaigt
wie ichs dan auch zu Wien hab obseruiert / allain wz der auß-
schlag des gesichts ab hat tragen vnd verendert / das doch kain
sonder irrung bringt in disen sachen.

Durch welche zaichen vñ pilonus des hy-
mels diser Comet sich bewegt / vnd mit welche Pla-
neten er sein Coniunction gehabt hat. Auß

Auß dem :iegsten Capitel ist's offenbar / das er am ersten ge
sehen ist worden / nach dem himel der vesten stern / darinn dan
dy pildnus seind / bey den zwillingē / von den selbigē hat er sich
bewegt mit seinem aigē lauff / durch dy pildnus des krebs / löwē
junctfrawē / wag vñ scorpion / ist auch möglich biß in schütze /
Ausserhalb aber des thierkraiß gegen mitternacht / ist er kumen
gar nahent zū dem grossen wagen oder Perū / darnach zū dem
hüter des wagens / zū der schlangen des schlangentragers / vnd
zum ersten ist mit im auffgangen der Drizon / vnd ein tail des
fluß Eridam.

So ist dy pildnus der zwilling zū vnsern zeyten / nach dem
obersten himel / im krebs / welcher ein hauß ist des Mons vnd
ein erhöhung Jupiters / vnd ist die Venus auch nahent bey
den hawpten der Zwilling / nach der leng gestanden / hat auch
dy erst cōiunction mit der Venus gehabt / Darumb auch des
Cometen farb sich fast genaigt hat zū weyßer farb.

Nach der Venus ist er kumen zū dem vierten schein Jouis
vñ Martis auch im krebsen / im Löwen hat er dy erst conium
ction gehabt mit dem Mercurio / nach im mit der Sonnē / vñ
darnach mit dem Mon in der Junctfrawē / hat er gehabt den
vierten schein mit dem Saturno / in der Wag dy zusammenfü
gung mit dem Jupiter / im Scorpen den gegenschein mit dem
Mars / vnd hat sich also zū tragē am 25. tag Augusti / das der
genschein des Cometen vnd Martis durch dy winckel gewe
sen ist / der Comet ist vnter gangen / vñ Mars mit dem süben
gestirn auff / hat vor hin den gantzen tag fast geregent vnd zū
nachts / nach des Cometen nidergang / oder omb dy selbig zeyt
hat sich ein solich vngewitter mit doner / plitzen vnd platzregen
erhebt / der gleichen man zū Wien in langer zeyt nit gesehenn
noch gedacht hat.

Auß disen ob erzelten zaichen / durch welche / vñ zū welchen
der Comet sich bewegt hat / sind fünf mēschliche / als zwilling

D

Junctfraw / wag / hütter des wagens / vng Orion der mit im ist
auffgangen / drey wässrige / Krebs / scorp vñ fluß eridam / zway
veste / als Löw vñ Scorp / zway feürige / als Löw vñ Schütz /
zway wilde / als Löw vnd die groß Perin / drey zwileybige / als
Zwilling / Junctfraw vnd Schütz.

Welchen geschlechten vnd sachen diser Comet mehr dzowen sey.

Auß dem vorigen Capitel ist anzeigt / zu was zaichen diser
Comet mit seinem aigen lauff kumen sey / darunter scind fünff
menschliche / vnd ist in der Junctfrawē am größten gewesen /
ist auch am ersten bey ainer menschliche pildnus erschinen be-
deüt das diser Comet am aller maisten / vnd zum vordersten
dzowen ist vnter allen andern geschlechten den meschen / Nach
dem menschen den flüssen vnd wässrigen thieren / dy im was-
ser vnd da bey sich enthalten / nach den selbigē den wilden thie-
ren die den mensche schedlich seind / zu letzt den giffrigen thieren
vnd gewürmen.

Das aber diser Comet bey der pildnus der zwayer kindlein /
welch man Zwilling nent / vnd im auffgang am ersten erschin
ist / droet am maisten den jungen leüden vnd allem jungen ge-
wächs / es sey von viech / leüdt / frucht / oder ander sach dy iren
ersten anfang nemen / vnd merer tayls den weybs pilden / dan
diser Comet dy erst coniunction mit der Venus gehabt / vnd in
der junctfrawē am größten erschinen / der gleichen allen den dy
mit weybischen handlung vnd sachen vmb gehen / vnd all die
vnter Veneris regierung geacht werden.

Darnach aber nit so heffig droet er den Mercurij kindern /
als sind all geleert vnd sinreich leüdt vnd die mit subtilen kün-
sten vnd handtwercken vmb gehen.

Der gleichen ist er auch dzölich den grossen Hawptern vnd
mächtigen Fürsten / Herrñ / vnd regierern / auch iren vnterhas-
nen / vnd allen den / welche der sonnen regierung vnterworffen

ist
ay
ig/
als
isfer
inff
en/
be/
ten
ach
as/
thie
eren
ein/
hin
n ge
jren
dan
D in
n dy
l die
ern/
ün/
vnd
tha
ffen

seind / vnd dem Mon / So hat diser Comet sein cōiunction ge
habt mit dem Jupiter / wie wol er klein gewesen / vnd fast im ab
nemen / dy weyl aber Jupiter mit sampt dem Mars vrsach di
ses Cometen irer opposition halben gewesen / vnd baid im eben/
nechtigen zaichen gesundē / der gleichen dy finsternus / welcher
würckung diser Comet vernewert / auch in ainem ebennechti/
gen zaichen geschehen / vnd diser Comet am ersten in des Ju/
peters erhöhung erschienen / darumb er warlich nit wenig den
geystlichen vñ iren preüchen droen ist / der gleichē droet er auch
den Juristen vnd was die gerechtigkeit betrifft.

Zu letzt hat er den gegenschein gehabt mit dem Mars dar/
umb er auch zu letzt schaden vñ vnfall droē ist Martis kindern
als den friegs leüden / vnd allen mit feür vñ eysen handthierē.

Was für obel vnd widerwertigkeit diser Comet droen ist.

Auß den ob angezaigtē vrsachen / auß welche diser Comet
entsprungē ist / wirt genomē dz er droet dise nachfolgende sachs.

Zum Ersten vnd fordersten / dürre vnd hitzige zeyt / vergiff
tung des luffts / Darauß folgt das wenig güter / nodtürstiger
frücht geraten werden / dem menschē vnd andern thiern zu vns
terhaltung / Darauß folgt teürung / wo dy frücht übel geraten
vnd mangelhafftig werden / welche menschen vnd thier dy sel/
bigen niessen / gepern im menschē vnd andern thiern böses vñ
faules plüt vnd andre feuchtigkeit / Darauß dann entspringen
vil grausamer vnd hefftiger krankheit / Sonderlich dy Pestil/
lentz / vnd sich darnach weyter auß prayt in andre landt.

Er droet auch sonderlich der prust vñ dem hawpt / wie wol
auch dem magen vnd dem pauch / aber nit so hefftig / Vnd in
welchem landt der lufft vergiffet ist / wirdt auch das wasser vn/
gesundt / dan auß dem lufft in Hölen der perg vnd erdrich ge/
pert wirdt das wasser / Sonderlich aber werden dy still stenden
wasser vngesundt / dan die selbigen sich nicht rainigen mügen

durch dy stain vñ sand als dz fließend wasser/ Darumb auch dy thier/welch von den selbigen wassern trincken/oder ihr nahrung darinn vnd darbey süchen/vngesundt werden/vnd souil dester mehr dan der Comet/drey wassrige zaichen vnglückhafftig gemacht hat.

Diser Comet ist dy merer zeyt bey den mitnechtliche zaiche gewesen/vñ darnach zu letzt in dy mittägliche tumen/darumb er droen ist/am cristen selzam bewegüg des erdrichs durch erpiden/vnd darnach vil vngestüme im lufft mit vil vñ grossen winden/der gleichē vil plitz/donder/schawer/vñ selzam vberling/oder ihächilng wetter/die on sondern schaden nit zergend/selzam feurig erscheinung im lufft/vnd vil schaden vnd nachtayl durch feuer/groß vngestüme im möhr/Sonderlich gegen mitternacht.

Von wegē der grossen vngestümē windt/droet er vil schiffprüch vnd extrenckung/nit allain auff dem Meer/sonder auch auff andern schiffreichen wassern/derhalbē auch die/welch nahendt bey grossen wassern wonen/vnfal/schaden vñ nachtayl zu fürchten haben.

Wo solche vngeschickligkait vnd vngesundthait des luffts ist/wachsen vil giftiger vnd vnnützer würmer/die dem menschen vnd andern gewachsen schedlich seind/als Heyschreckē/keferen/krotten/meiß zc. die verdörben nit allain dy kreüter/pewm/pletter vnd frucht/auff dem feld/sonder auch in städeln dahaimen/von welchen dy menschen vñ andre thier jr nahrung haben sollen/vnd darnach von den selbigen süchtig werden.

Disen nachtail droet er am maistē zu sumers zeyten/dan er in einem somerliche zaichen am ersten erschinē ist/darumb dy frucht vil nachteil vñ schadē über steen müssen zu d zeit irer zeitigüg vñ ferung/vñ gleich wie es in der grossen welt also auch in der kleinern welt/das ist im mensche (dan der mēsch dy klain welt bey den weysen gericht wirdt) sich alle ding schicken/dann auß der hitz vnd truckenhait des luffts/folgt abnemüg der nahrung

türlichen feuchtigkeit im menschen / vnd mert sich dy wörm vñ
trucken (welch man Coleram nent) feuchtigkeit / wo sich dy sel/
big mert / wirdt der mensch hitziger / auß dem selbigen dy men/
schen bald zu zorn / vnwillen / vnd vngedult bewegt werdē / wel
chen darnach nachfolgen krieg alle vnwilligkeit vnd boßheit.

Darumb nit klain vnd wenig krieg zuzürchten seind / zum
tail auch zwischen den Obzigtaitē vnd iren vnterthanen / wel/
ches sonderlich anzaigen thut der Stern mit den schwerten / der
in der woche Judica erschienen ist / das zaigt auch an diser Co/
met / dan er in einem sunnē wendigen zaichen am ersten sich er/
zaigt hat / zaigt an zerrüttung vnd verändrung des gemainen
volcks / zu auffrur / Vnd werden sich dy vnterthanē hefftiglich
an etlichē orten bewegen / wider jr Oberkait / vnd frembde hilff
suchen.

Man wirdt selzam vnd wunderlich anschleg vnd verräte
rey brauchen / der gleichen lang nit erhört worden ist / vnd der
merer tayl aller zwitracht vnd vnainigkeit / wirdt sein die ver/
endrung etlicher geystlichen preuche / die iren vrsprung haben
von mitnacht vnd auffgang / vnd wirdt sich auß praiten gegen
mittemtag vnd nidergang.

Dy weyl aber Jupiter in der opposition / auch der zejt der
erscheinung des Cometen schwacher gefunden ist worden dan
Mars / der in seinem aigen Haus gestanden ist / vnd bey sternē
seiner vnd Saturni natur / darumb dise verendrung hardt on
plütuer giessen vergeen wirdt / vnd werdē Martis kinder über/
handt nemen / vñ meh: durch forcht des schwerts dy leüdt auff
jr seyten wenden dan durch güte leer.

Aber zu letzt wirdt doch ein vergleichung geschehen / vnd zu
güter rhü dy sach kummen / Als dan werden die iren lohn emt/
pfahen / die aller vnrhü vnd übels vrsach sind gewesen.

Wie wol diser Comet in ainem fallenden Haus / das ist im
Haus der gefengnis am ersten gesehen ist worden / darjn er an/
zaigt sterben vñ ihächs endt / vnd vil gefengnis / So hab ich

kein zweyfel / wo man achtung darauff het gehabt / man het in
im orizonten am ersten gesehen da er ist auff gangen / an welch
em ortz (wie dy Astrologi anzaigen auß langer erfahrung) eines
namhafften Herrn abgang bedeiüt / Sonderlich in denen lan-
den / welch dem selbigen zaichen / darñ er zum ersten erschinē /
vnterworffen sein / vnd dy selbigē haben auch zufürchtē einen
krieg von ainem außlendigen vnd frömbden feindt / Sonder-
lich von auffgang der Sonnen vnd mitteintag / dan er sich fast
gegen denē zwayen orten bewegt hat / vnd dise sach wirt durch
verräterey zügericht werden / oder durch einen anfenger grosser
Sect.

Die wilden thier werden schz wüten / dem menschen vñ an-
dem haimischen thiern zuschaden / vnd werden dy mensche be-
wegt / die selbigen mit gewalt zuuerderben vnd auß zu reüten.

Ein grosser mechtiger Herr inn der Christenheit der wirdt
vil vñ weyt raiß fürnemē / aber er wirdt vil hindernus leyden /
vnd vil widerwertigkait vñ irrung empfinden / vnd an grossen
schaden vnd gefärligkait / wenig raiß auß richten.

Ein ander mechtiger Herr / der nit vil nidzer geacht wirdt /
hat an seinen gütern / durch seine feint vnd widerwertigen / ein
nachtayl vñ schaden zu fürchten / Auch ein kümernus zü steen /
von aines weybs oder weybischen sachen wegen / Aber sy baid
werden an iren widersachern vnd feinden wider gerochen wer-
den / vnd iren vnfall vnd schaden scheinbarlich sehen.

Dy Machometisch Sect / wirt widerwertigkait zu fürchtē
haben / zaigt an der Mon (welcher jr schildt vñ Helm ist) dan
er das Jar schier all monat gar nahent zü iren widerwertigen
stern / in des stiers aug sich verfügen wirdt / vnd etlich mal den
selbigen verdecken / darumb auch der Mon vnseelig wirdt von
dem selbigen stern / Aber doch ist dise Sect nicht zu verachten /
dan der Jupiter kumpt in jr zaichen / das ist in Scorpion / vnd
zum endt des Jars / kumpt er zu im stern / Darumb wirdt dise
Sect / vil vnd grosse sach vntersteen / mit krieggen vnd selzame

anschlegen wider ire feinde.

Es hat sich auch das 31. Jar scheinbarlich anzeigt / das dy
Machometisch Sect vnter dem stern im hertzen des Scorpen
ist / vnd das volck das kain hawpt haben wil vnter des Stiers
Aug / dann sy beide dises Jars widerwertigkeit geliten haben /
wie ichs dann von der Machometischen Sect anzeigt hab im
vergangen Jar / auß dem das bedüter der Sonnē finsternus
gar nahent nach der leng bey des Sties aug gewesen ist / vnd
im gegenschein des Scorpen hertz.

Darumb auch künstig sein wirt auß natürlichem lauff des
gestirns / das dz vnzam volck / sich mit irem alten hawpt wider
vergleichen wirdt / dan vor wenig Jaren ein künstig geporen ist
worden / des selbigen stammen / welch von den yhren / vmb das
yhr / auff dem yhren von dem vnzamen volck erschlagen seind
worden / Der selbig jung König / hat auch des Stiers aug im
asendenten / darumb sy gut ains mit einander sein werden.

Die weyl aber der selbig jung künstig / vnd das vngehorsam
volck / ganz widerwertig gestirn / gegen der Machometischen
Sect haben / Ists ein anzeigüng / das der selbig iung künstig mit
disem volck (so im anderst Got sein leben verleicht) werdē auff
das höchst schaden / vnd grossen mechtigē abbruch thun diser
Sect / vnd das rechen / vnd einnemē / das sie yhren Eltern mit
gewalt hat abgedrungen.

Von der zeit der würckung dises Cometen.

Auß den ob gezaigten Capiteln / mag ein yetlicher verstee
das diser Comet am ersten erschein ist / zwischen auffgang vnd
mitternacht / vnd ist ein anzeigung / das sein würckung bald
sich anheben soll / wie wirs dann in Osterreich wol empfunden
haben / dan seyt seiner erscheinüng / truckne vnd warme zeit offt
genüg / sich erzaigt hat.

Wie lang aber sein würckung wern soll / vnd in welchem

Jar sich enden / Hat biß her kein Astrologus eigentlich beschri-
ben. Etlicher mainung ist / man soll für ein yetlichen tag seiner
werung (dy weyl der Sonnē finsternus sein vrsach ist) ein Jar
rechnen. Nach diser mainung müst dises Cometen würckung
biß auff 28. Jar sich erstrecken / dan souil tag ist er gesehen wor-
den / aber ich kan es nit für gerecht achten vnd für gewis / dann
ym 1264. Jar ist ein grösser Comet erschienen / vnd drey monat
lang gewert / vnd hat sein schwantz von auffgang biß auff den
mittag Circfel geraicht / find ich auß den historien / vñ auß den
lerern die da von schreiben / nit mer dan 6. Jar / das sein würck-
ung scheinbarlich sich erzaigt hat.

Item im 1497. Jar / hat auch ainer geschinen / find ich nit
mer dan drey Jar das sein würckung gewerdet hat.

Item im 1506. Jar / hat auch ainer geschin / vñ auch schier
ein monat gesehen worden / vnd auch schier ein größ mit dem
gehabt / Dem selbigen hat nach gefolgt der krieg mit den Vene-
digern / der hat nit gar Newn Jar geweret

Etlich mainē als vil er zaichē durch lauff / souil jar sol wern
sein würckung / das auch nit kan sein / dan etlich Cometen / als
Ptholomeus schreibt / pleyben an ainem ortz still stehen / müst
desselbigen würckung nür ein jar wern / das ich auch bey kein-
em leerer find.

Dy weyl aber diser Comet / klain gewest ist / auch nit gar zu
lang geweret / nemlich nit über ein monat / so ist er in ainem be-
weglichen zaichen am ersten erschienen / kan ich nicht abnemen
das sein würckung auff vil Jar sich erstrecken sol / Nemlich auff
das aller lengist / so vil jar als des negsten Cometen im 6. Jar
geschehen / dan fast ainer so lang geweret hat als der ander.

Von der Größ oder kreffte der würckung.

Als sich der finsternus würckung mert vñ mindert / auß der
größ der beschattung / der Körper Sonne vñ Mons / vnd
auß

au
un
un
C
sch
de
au
be
pi
sch
v
zu
sa
ai
da

all
ch
sei
an
sta
de
ge
d
ge
da
ter
fer
M

aus der kreffte des Herrñ / also meert / vnd mindert sich dy würckung eines Cometen / auß seiner größ / auß der zeyt der erscheinung oder wehrung vnd krafft seines Herrñ / wie wol der Herr des Cometē starck ist / in seinem eigen hauß / vnd zū der zeyt der erscheinung bey bösen sternē / nāmlich bey den hörnern des widers / vñ hoch an dem Hymel / so ist er doch nit seer groß gewest / auch nit gar zulang geschinē / vnd sunderlich dy weyl er nahent bey der Venus sich erzündt hat / vnd in der erhöhung des Jupiters / sind gute anzaigung / das diser Cometen würckung / nit sehr hefftig sein werden / wie wol sy am ersten etwas grausams vnd erschrecklichs anzaigen möchten / so wirdt doch das selbig zū einem guten endt kummen / also das sein würckung / in allen sachen mitsamer vnd linder werden dan etlich mainē / wie wol ainer zeyt hefftiger sich erzaigen wirdt dann zū der andern / wie dan der künfftig lauff der gestirn dasselbig schicken wirdt.

Welchen Reichen / Landen vnd Stöten diser Comet mer drolich sein wirdt.

Dy himlischē vrsachē oder würckung / sind nit gleich droen aller welt / etlichen mehr etlichen weniger / welchs auß den zai-
chen / darinn der Comet erschinen vñ durchlossen ist / vnd auß seinem regierer genommen wirdt / Dy weyl aber diser Comet am ersten erschinē ist im Krebsen / vnd sein Herr im Wyder gestanden / drohet am maistē denen Landen vñ Stöten / welche dem Krebse vñ Wyder vnterworffen sind / Darnach aber ringer yhzem Quadzangel / wie wol dy Wag auch in disen quadzangel begriffen wirdt / vnd bey dem Herrñ der Wag am erste gesehen worden / das ist bey der Venus / So ist doch zuhoffen / das dy würckung des Cometen / in den Landen der Wag vnterworffen / nit also hefftig sein wirdt / als bey denē die dem kresen vnd Wyder vnterworffen seind / Dann der Comet in der Wag fast abgenommē hat vnd klain gewest / darzū auch das

℥

!

Jupiter darinn die selbig zeyt gewesen ist.

Dy weyl aber der Comet durch den Löwen/ Juncckfrawen vnd Scorpen/ sich bewegt hat/ darumb drohet er auch denen/ welch disen Zeichen vnterworffen sein.

Es schreibt auch Ptholomeus vñ ander Astrologi/ das ein Comet am maisten drohen ist/ denen Landen/ gegen welchen sich der Schwantz thut naigen/ muß die vrsach sein/ das von dem selbigen orth/ die materi des Cometen/ sey übersich zogen wordē/ vnd in welchem Landt dy materi wirdt übersich zogē/ da selbst macht der Comet das maist übel.

So hat sich dises Cometen schwantz am ersten fast genaigt gegen mitternacht vnd auffgang/ darumb er am maisten denē Landen drohen ist/ die gegen mitter nacht vnd auffgang ligen/ Darumb sich in den selbigen Landen ein übel erheben wirdt/ das selbig wirdt sich darnach außspraiten/ gegenn mittem tag/ zum tayl auch gegen nidergang.

Vnter welchen himlischen Zeichen/ etliche Reich/ Landt vnd Stett geacht werden.

Wyder Teütsch Landt / Frankreich/ das minder Polnerlandt/ Naplas/ Florentz/ Ancona/ Capua/ Cracau/ Passaw

Stier Das grösser Polner landt/ Schweinitz/ Sena/ Verona/ Posen/ Perus/ Campania.

Zwilling Egipten/ Engellandt/ Flandern/ Württemberg/ Paris/ Nürnberg/ Erfurd.

Krebs Denmargk/ Norbegen/ Preüssen/ Hollandt/ See/

lande/ Vincenz/ Constantinopel.

Löw Ein grosser teil des Wälischē Lands/ Behaim/ Rhein
strom/ Mantua/ Damascus/ Prag/ Vlm.

Junckfraw Kriechenlandt / Schlesi/ Papia/ Preßlaw/
Venedig nach etlicher mainung.

Wag Osterreich/ Elsaß/ Placentz/ Swessa/ Caieta/ Vtrich
Wien/ Salzburg/ Augspurg das Reich Apulie.

Scorp Ein grossen tayl der Lombardy vnd Friaul/ Mayz
landt/ Brixen/ Genua/ Padua/ Rutina/ Cremon/ Teruis/
Ferrâr/ Valentz.

Schütz Hispania/ Vngerlandt/ Dalmatia/ Ofen/ Auinis
on/ Jerusalem.

Stainpock Bayrn/ Steyrmargt/ Romandiola/ Ingolz
stat/ Rauenna.

Wasserman Sachssen/ Costnitz/ Vrbín/ Behaim/ nach
etlicher mainung.

Bisch Portugal/ Hiberina/ Normãdia Alexandria/ Köln/
Venedig nach etlicher mainung.

!

Hieronymus Saporanolog

A. 170, 21.

